## LE RENOVVELLEMENT

## DV CHRESTIEN

o v

SERMON DE RAIMOND GACHES, fur le chap. 5. de la 2. Epistre de S. Paul aux Corinthiens v. 17. Si quelqu'un est en Christ qu'il soit nouvelle Creature.



AZ 2923

Se vend à Charenton,

Par Samvel Perier, demeurant à Paris dans la court du Palais, au Roy de Suede.

M. DC. LVII.



## SERMON

SVR LA II. AVX COR. chap. v. vers. xvii.

SI DONC QVELQV'VN EST en Christ, qu'il soit nounelle Creature.



I EN que toute nostre conuerfation doine estre vne continuelle profession du Christianisme; bien que particuliere-

ment toutes les fois que nous venons dans ce Temple nous protestions à la face du Ciel & de la terre par ce tesmoignage exterieur de nostre pieté, que nous sommes Disciples du Scigneur Iesus, & que nous auons droit à cette alliance qu'il a traittée de la part de Dieu auce les hommes, neantmoins il n'y a point de doute que nous ne professions plus hautement, & plus clairement la Religion que nostre Christ nous a enseignée, & que nous ne nous monstrions

plus estroitement attachez à suy tomes les fois que nous auons l'honneur de participerà cet Auguste Sacrement. Icy tous nos pas & tous nos mouuemens femblent dire tout haut, que nous ne cherchons que le Seigneur lesus, & que la gloire d'estre à luy fait toute nostre selicité. Les & cette chaire & cette table pour peu que nous soyons actentiss aux discours qu'on nous adresse sur l'vne, & à l'action qui se celebre sur l'autre, nous peignent le Seigneur Iesus deuant les yeux auec vne si grande euidence, que les ames des moins deuots en sont touchées, & que les cœurs les plus insensibles en sont émeus. Icy l'Euangile qu'on nous presche, le Sacrement qu'on nous administre, les marques de zele que nous voyons dans les yeux & sur les visages de nos Freres, la solemnité du jour, la sainteté du lieu, les colomnes mesme & les murailles de ce Temple tout nous annonce Christ, tout nous entretient de Christ, & quelques froids que nous foyons en la pieté, nous paroissons pouttant ne desirer que la grace de Christ. n'estre assamés que de sa Chair sacrée, & n'estre alterés que de ce Sang pretieux,

qu'on luy a veu répandre pour nostre sa-i lut sur la montagne du Caluaire. Mais helas! c'est vne chose estrange que les habitudes du cœur, & que la conduitto ordinaire de nostre vie répondent si mal à vne profession si honorable, que parmy tant de Chrestiens il y ait si peu de sidelles, que parmy rant de personnes qui s'appellent Disciples de Christ il y en ait si peu, qui oyent sa voix & qui la suiuent, qu'enfin les Eleus composent toussours vn petit troupeau, au milieu de la foule & de la multitude de ceux qui sont appellés. O, mes Freres! qu'il ne suffix pas de crier auec les Juifs, le Temple, le Temple, le Temple de l'Eternel, ô qu'il ne suffit pas de porter au dehors les enseignes du Chrestien, c'est le cœur qui doit estre le premier à Christ, c'est l'ame qui doit estre esclairée de ses lumieres, persuadee de sos verités, enflammée de son amour, & toute enrichie de fes graces Siquelqu'un esten Christ, qu'il renonce donc au monde, qu'il reueste les sentimens de la pieté; qu'il soit nouvelle creature. Nous auons vn singulier besoin de receuoir cet advertissement de 12 plume denostre Apostre; que ne puis-

je auoir pour cette heure quelque étincelle de son seu, quelque rayon de ses lumieres, pour vous le porter auec plus de succez. Que pensez vous faire, ô hommes, vous dit aujourd'huy S. Paul, croyez-vous qu'il suffise de vous assembler dans vn Temple, d'y faire hautement retentir les louanges de l'Eternel, d'y escouter son Enangile, & de vous y presenter à sa table; Non, non, il faut aller plus auant, & si vous estes veritablemet Chrestiens, come vous le voulez paroistre, il faut quitter les coustumes corrompues que le monde fait observer àceux qui sont siens, il faut dépoüiller les vicilles habitudes du vice, il faut viure comme des bourgeois des cieux, c'est là estre serieusement Chrestien, c'est là appartenir à Christ, quad on a les sent imés &les inclinațias qu'il approuue.&qu'on marche apres vn si grand Maistre dans le chemin de la pieté; mais pour penetrer plus facilement dans le sens de ces paroles, nous auons dessein premierement de voir ce que c'est qu'estre en Christ, apres cela nous examinerons ce qu'emportent ces mots, estre nounelle creature, & ainsi nous nous ouurirons

7

facilement le chemin à l'intelligence du raisonnement de l'Apostre, qui conclud de ce que nous sommes en Christ, que nous deuons estre des creatures nouvelles. Cette creation, ô Dieu, n'est pas moins ton ouurage que la premiere, ta seule main peut sormer de nouveaux cœurs, accompagne donc maintenant ta parole en nostre bouche de l'essicace puissante de ton bon Esprit, asin que comme nous nous glorisions tous d'estre à ton Christ, il nous rende aussi veritablement de nouvelles creatures.

blement de nouvelles creatures.

Estre en Christ, à prendre ces mots simplemet, c'est estre Disciple de Christ, faire profession de l'Euangile de Christ, ce que nous appellons estre Chrestien.

C'est en ce sens qu'il est parlé au 1. de l'Epistre aux Gal. des Eglises de Iudée qui estoient en Christ, c'est à dire, qui estoient Chrestiennes, & distinguées par là des Synagogues des Iuiss; ainsi est il parlé souvent des Saints en Iesus-Christ, c'est à dire, des sidelles Chrestiens. Si quelqu'vn est donc en Christ, dit l'Apostre, si quelqu'vn a embrassé le Christianisme, s'il a renoncé à l'idolatrie des Payens & à la superstition des Iuiss, il faut qu'il

foit vne nounelle creature, & qu'on nemarque en luy vn changement merueil. leux. Mais il ne faut pas M.F. considerer negligemment cette façon de patier estre en Christ, elle nous apprend qu'il faut estre veritablemet vny au Seigneur Iclus pour estre veritablemét Chrestien, il faut tirer de luy son aliment & sa vie, il faut estre animé de son Esprit, il faut estre un mesme corps auecluy, & le secret de cette vnion estant'admirable, il faut arrester nos esprits à en considerer les merueilles. Dans l'ordre de la natua re nous naissons tous vnis au premier Adams par cette longue suitte d'ayeux dont nous sommes descendus nous motons iusqu'au Pere de tous les hommes, de qui la nature & la corruption s'est de Pere en Fils prouignée iusques à nous. En Adam les hommes se separerent de Dieu comme il s'en esloigna luy-mesme par son peché, tous ses enfans en nais-Cent effoignez par vne suitte necessaire de leur nature, ils naissent tous enfans d'ne, ils sont tous conçeus dans le peché, ils font tous en naissant dignes de mort. Et de nicline qu'vne branche coupée d'vn arbre, peut bien entre les mains d'vn Artifan

Artisa ingenieux, servir à faire quelque besu meuble : mais comme elle est separée de son tronc, & comme elle n'a plus de vie, elle ne scauroit porter de fruit, & quoy qu'elle foit foustenue pat la terre, elle n'y tient pas par des racines & n'en retire point de suc, de mesme l'hommo n'estant plus vny à Dieu comme à l'Autheur de la sainteté, & commo à la source de la grace, estant retranché de cette tige pouvoit bien estre employó à quelque vlage dans la police, ou dans la culture de la terre, ou dans l'exercico des sciences & des arts, il pouvoit estre comme vn beau meuble sur la terre mais il ne pouvoit fleurir ny fructifier à la gloire de son Dieu; Dieu le soustenois par sa providence, mais l'homme ne ren ceuoit pas de luy le suc qui entretient en Juy vne vie spirituelle, C'estoit vno plante seche & morte, qui n'auoit point de racineny de vigueur, & qui ne pou-Moit à la fin qu'estre jettée au seu, & qu'estre consumée par la colere de l'Ezernel. Estantainsi separez de Dieu ce m'estoit plus sa gloire, mais la nostre quo nous cherchions dans tous nos desseins, & dans toutes nos actions; ce n'estois В

j

plus luy que nous aymiens souueram. ment, nous nous aymions founerant ment nous melme, & rapportions en tes choses à nostre propre satisfaction Nos bras vois à nostre corps n'agissel pas pour eux-mesmes, ils cherchenes bien de tout le corps, dont ils ne son qu'vne partie; leur estre ne se bornepail eux-mesmes, c'est l'ame qui viuisie ton le corps, qui anime aussi & qui fait agi les bras, & qui addresse leut action au bien vniuersel du corps, en telle sorte qu'ils s'exposeront aux coups qui menacent la teste, & senegligerone eux-mesmes, afin desauter tout le corps. Mais hvn bras estant retranché du corps auch encore du sentiment & du raisonnement, il se horneroit alors luy-mesme, if chercheroit son propre bien, & il agirole desormais pour sa conservation, & non pas pour celle du corps dont il seroit fiparé. L'homme estant vny à Dieu, n'agissoit pas pour soy-mesme, ce principe le bornoit, & il ne cherchoit que la gloire de son Dieu, mesme par son propie dommages mais le peché ayant fait le paration entre Dieu & l'homme, l'homme s'est borné soy-mesme; s'est avmé

souverainement soy-messate, & a este luy mesme la fin de toutes ses actions.

d

(i

j

3

1

ķ

11

1

3

Dieu a voulu nous reunirà soy-mesme, nous rendre de nouueau participans de la vie, & il a enuoyé son Fils pour estre le lien de cette vnion. En Adam nous nous estiõs separez de Dieu, en Iclus Christ nous no? reunissons auec Dieu, il verse les graces de son Esprit ennos cœurs, qui cit vn nouveau principe de vie aqui nous fait estre membres du corps de Christ, qui fait que Christ, nous borne, & que ce que nous viuons, nous ne le viuons plus à nous mesmes, mais mais en la Foy du Fils de Dieu qui nous 13 a aynıcz, & qui s'est donné soy-messue pour. nous. Nous sommes donc unis à lesus-Christ, premierement comme des suj jets à vn Roy, pour faire vne mesme so-, , cieté spirituelle, & pour composer ce, Royaume que l'Escriture Sainte appelle le Royaume des Cieux. Ileft le Chef do. nostre Foy & de la Religion que nous professons, il est le Mediateur de l'alliance que Dieu a de nouveau traittée. auce nous, il est le Roy de l'Eglise, & pous nous glorifions d'estre de ses Disciples, d'estre de ses racheptez, d'estre Bij

du nombre de ceux qui luy sont soubmis, d'auoir receu ses loix, & de viure en son obeyssance, & de cheminer dans la voye qu'il nous a marquée, reconnoissans que c'est seulement par elle qu'on peut arriuer à la jouyssance du Paradis & de l'immortalité. En cela nous auons auec luy vne vnion plus estroitte qu'il n'y en peut auoir entre les hommes, car les vnions politiques ne regardent que les interests du dehors, & cette vnion va au cœur & lie les consciences, & les vnions politiques, ne pretendent pas s'e-Rendre au delà de la mort; dans le tombezu les cendres du Prince se confondent auec celles de ses sujets, mais dans cette vnion aueo Christ nous pretendons d'y trouuer nostre bon heur apres cette vie, & viuans & mourans nous voulons bien toussours releuer de son Empire: carpourcela Christ est mort, & estretourne à vie afin qu'il ait seigneurie tant sur les viuens que sur les morts. Neantmoins nostre vnion quec Christ nes'arreste pas encore là, elle a des liens plus puissans, & ellene consiste pas seulement dans ce choix que nostre raison peut faire, & dans ce ferme dessein de

hostre cœur, de vouloir le reconnoistre pour son Docteur & pour son Roy, de receuoir ses enseignemens comme les oracles de la verité, & ses loix commo les arrests de nôtre Souverain qui doiuée estre les regles de nostre vie. Pour serrer plus estroittement ce nœud & afin que noussoyons effectivement en Christ, ik enuoye son Esprit en nos cœurs, son Esprit qui est à nostre ame, ce que nostre ame est à nos corps, son Esprit qui donne de nouuelles lumieres à nostre raison, de nouvelles inclinations à nostre volonté, de nouvelles esperances & do nouuelles ioyes à nostre cœur; En tecj connoissons nous que nous demeurons en luy & luy en nous, pour ce qu'il nous a donné son Esprit." Ican 4. Et nous ne deuons pas auoir de la peine à comprendre comment cet Esprit de Christ peut sanctifier ainsi nosames, il est bien plus mal-aise de conceuoir comment Adam, en nous communiquant fon lang, nous communique sa corruption, comment nostre ame peut estre infectée de son venin, pour ce que nos corps tirent de luy leur origine, c'est à dire, comment le corps peuragir fur l'esprit, qu'il ne t'est B iii

de conceuoir qu'vn Eprit Tout-puillet comme celuy du Seigneur s'infinuant dans nos ames, y puisse imprimer de nouvelles qualitez, & y produire va changement si admirable; Il n'est pas mal-aifé non plus de dire comment cet esprit nous peut estre communique, coment il est en I. C. & en tous les fidelles tout ensemble, car c'est l'Esprit de Dica qui est immense & qui réplit le Cicl&h terre; Cét Esprit divin duquel David disoit au Ps. 139. qu'il suy estoit impossible de se cacher deuat sa face. Mais comme encoreque nostre ame soit répanduept tout nostre corps pour le faire viure, elle ne raisonne pas pourçant dans toutes le parties de nostre corps, mais elle voil par l'organe des yeux, elle oyt par celu des oreilles, & si elle n'a pas propremen yn organe pour la raison, neantmons c'est dans le cerueau qu'elle trouue le idées sur lesquelles elle establit son rai-Ainsi l'Espriz de Dieu fonnement. se mouvoit au commencement sur les caux afin de les rendre fertiles, & de tirer du chaos les merueilles qui paroif sent dans la nature, ce mesme Espritsor gient le monde & dispose de tous la

euenemens. La lumière que les Philosis fophes ont eue pour les choses de la nas rure, estoit vn de ses rayons, ceux qui ont eu du genie pour les arts ont receu vét aduantage de sa main, la prudence des sages Politiques, la magnanimité des grands Conquerans, la constance # des ames genereules, c'estoient tous des 🕫 dons de l'Esprit de Dieu; mais il n'agir pas en tout cela comme Esprit regenerat, & comme Esprit de Christ, comme tel fon propre ouurage c'est d'imprimer dans les cœurs vne Image de la sainteré de Christ, & en cét égard co sont ¿ les seuls Chrestiens qu'il animé, ce sont Les seuls Chrestiens qu'il vnit à Dieu. S'il opere en toutes les creatures, il les vnit à Dieu comme à l'Autheur & au sou-Alien de la nature, mais quand il opero dans les fidelles, il les vnit à Dieu comme à l'Autheur de la sainteté, & comme à la source de la vie spirituelle. Cet Esprit donc n'est que dans les sidelles en ce sens pour les vnir à lesus-Christ, & comme les diuerses parties de nostre corps quoy qu'esloignées les vnes des autres, quoy que d'vne differente con-Rieution, peanemoins tandis qu'vne

incline ane les anime elles sont les purties d'yn mesme corps; Ainsi en quel ques divers endroits du monde que le fidelles habitent, ce melme Elprit habiracen eux les fait estre vn mesme corps. O, mes Freres, que c'est peu de chose d'estre vny à Dieu en la nature pour es retirer lavie & les benedictions temporelles, & neantmoins your sçauez quelle estime on fait de ces biens, & qu'est ce de luy estre vny en la grace ! Le considere le monde comme vn grand Empire, duquel Dieuestle Monarque Souuerain, à qui tous les hommes font assejettis, sa prouidence eternelle pouruoi a cux, & les gouverne, il les esseue, il les abaisse selon sa volonté, il leu enuoye des pluyes & des saisons feriles pour faire naistre les bleds qui do uent seruma leur noumiture, il conseiu lour vie, & ils tiennent de luy anecet te vie, leur estre, leur mouuement, cou ce qu'ils sont, tout ce qu'ils possedent. Mais re considere les sidelles comme la samille de ce Monarque, au milieu de laquelle il habite, qui sent les effects è sa presence, qui reçoit ses caresses, qui a part à les thresors, qui approche de luy

Iuy auec liberté, & qui doit posseder son heritage. O que de nostre costé nous deuons estraindre le lien de cette vnion par les actes de nostre repentance & de nostre foy: car ne nous y flatos pas, ce n'est pas vn vain tiltre que celuy de Chrestien, il faut que la cho-se l'accompagne, & comme quand l'Esprit de Dieu remplit Betsaleel pour rendre son genie capable de reussir das l'art de faire le Tabernacle; il deuint inge-nieux, & son ouurage sit paroistre qu'il y auoit eu en luy quelque chose d'extra-ordinaire ; comme encore lors que Diéu appella Saul à la conduite de son peu-ple il sut changé en vn autre homme, son ame sust en vn moment esclairée des lumieres de la prudence politique, il cult melme quelques transports qui lo firent conterentre les Prophetes, & vn changement si soudain donna lieu à ce Prouerbe en Israel Saul est-il entre les Prophetes. Lors que l'Esprit saint du Scigneur Iesus habite en nous, si nous no sçauons pas l'art de regner sur les peuples, il faut que nous apprenions au moins à regner sur nos passions, si nous n'auons pas les extases des Prophetes, il faut que leurs exhortations fassent impression dans nos esprits, & nous changent. Si quelqu'un est en Christ qu'il sui nouvelle creature.

L'Escriture Sainte donne diuers noms à l'ouurage de nostre sanctification, elle l'appelle quelquesfois vn transport de Royaume des tenebres au Royaume de la merueilleuse lumiere de nostre Seigneur Iefus-Christ, 1. Col. 13.1. Pier. 2.9. representez-vous donc l'estat de ceux qui s'égarent pendant l'horreur d'vne nuid obscure, qui font autant de cheutes que de pas, qui ne sçauroient discerner le chemin qu'ils doiuent suiure, qui pensent à tous coups voir des fantosmes qui les espouuantent, qui craignent la rencontre des bestes sauuages, & qui tremblent au mouuement des fueilles c'est là l'Emblesme de nostre condition deplorable; tandis que nous sommes sous la puissance du peché, nos esprits nescauent discerner le vray bien d'auec celuy qui n'en a que l'apparence, nos consciences sont saisses de mille ter reurs, nos cœurs sont agités de continuelles inquierudes, nous ne voyos que des precipiees de toutes parts, & si les

Į,

H

þ

, 1

3

ď

renebres sont l'image du ducil, & de la gristesse, nous sommes alors vericablement dans la nuict, estant enuironnezde maux, & incapables de gouster vno ioye pure & solide. Mais la sanctification nous appelle à la lumiere, & si celle qui esclaire nos yeux, est l'ornement du Ciel, la ioye de la terre, la gloire du monde, l'esclat de la beauté, & les delices de la veue, celle de l'ame, n'est-elle pas vn rayó de la diuinité, ne porte elle pas dás les cœurs la paix & la ioye ? no nous monstre-elle pas le chemin qui coduit au Cielin'appaise-ellepas nos craintes? & ne moître-elle pas à nos cœurs la beauté de la vertu, qui la leur fait aymer & qui leur fait hair le vice? L'Escrituro dit encore que par la sanctification, de morts nous sommes, faits viuans; Auezvous veu quelque corps mort, auez-vous veu ses paupieres abbatuës, les narines ouvertes, ses dents serrées & ses oreilles fermées au cris de toute vne famille affligée? Auez-vous remarqué qu'en céo estat, il n'exhale que de la puanteur, il. est plein de corruption, il est l'horreur des yeux & de l'odorat, & on ne luy peut plus destiner que la triste demeure d'vn tombeau? Voila l'image d'vne au vicieuse, toutes ses secultez sont corrompues, ses yeux sont fermés aux lumieres du S. Esprit, ses oreilles ne sçanroient s'ouurir à la voix de Dieu, il ch execrable au Ciel & à la terre, & les enfers seuls peuvent estre son partage. E: lors que Dieu luy donne la vie, l'Espri de Christ ouure ses oreilles, esclairese yeux, r'anime son cœur, le remet se pieds, redonne à nostre ame sa beaute qui auoit esté esfacée, & sa vie qu'elle auoit perduë, luy faisant onyr cent voix, Resueille-toy, toy qui dors, & te relez d'entre les morts & Christ t'esclasrera. L'El criture appelle encore cet ouurage vne regeneration, & dit que la parole de Dieu est la semence de laquelle nous fommes de nouueau engendrés, & cer ( te expression a du rapport auec celle d: nostre texte, où il nous est parlé d'vne nouuelle creation. Ainsi, Eph. 2. 10-11 est dit que nous sommes l'ouurage de Dies crées en lesus-Christ à bonnes œuures qu' Dieu a preparces afin que nous cheminions es elles, Et Dauid Psal. 51. demandoit Dieu qu'il creast en luy vn esprit bies remis. Conceuez s'il est possible is

5 43

íon

(sub

TOIX &

definuts du neame ou du moins les confusions & les hoffeurs du Chaos. Conceuez apres cela la beauté de cét vniuers que Dieu tira des confusions du Chaos, & des abysmes du neant. Voila l'image de l'estat malheureux où nous estions لعتادا naturellement, & de la condition glore lins ricuse à laquelle nous auons esté appel-100 60 lés. Il n'y auoit dans le neant aucune 12.3 disposition à l'estre, il n'y a dans l'homme pecheur aucune disposition à la piemesme à la production des choses, I'homme ne contribue point de soymesme à sa sanctification. Le Chaos n'estoit que desordre, & que confusion, ail estoit sans forme & vuide, l'ame de A homme dans le peché n'est que tenebres, que déreglement, & qu'horreur. I faut que Dieu déploye icy vne puis-l'ance infinie, qu'il démesse ce Chaos, "ju'il esclaire ces tenebres, & qu'il cree e nouvelles inclinations dans nos æurs. Où sont donc ces esprits enflez Horcent auec l'heretique Pelagius
Acuer l'idole de leur franc arbitre, & donner à l'homme des forces pour se preparer à sa conugration, & pour so determiner de soy-mêsme au bien. O homme, tu dois tout à Dieu en la nature, tu dois tout à Dieu en la grace, tu ne t'es pas disposé toy-mesme à venir au monde, tu ne t'es pas disposé toy-mesme à entrer dans l'Eglise, ces efforts sont au dessus de ta nature, & nous receuons quand Christ nous appelle & now vnit à soy, vn estre surnaturel & celest Si quelqu'un est en Christ qu'il sont nounclu creature.

Pour penetrer mieux dans le sens de l'Apostre, nous sommes obligez à considerer la suitte de son discours. Il aucil témoigné yn grand aneantissement en foy-mesme, il auoit dit qu'il ne se met toit pas en peine de justifier sa conduir te enuers les Corinthiens, que s'il eft transporté d'entendement, il l'estoit à Dun que s'il estoit de sens rasis il l'estoit à enxi Cestà dire, que s'il ne sembloit pas vis de la prudence ordinaire, c'est qu'il negligeoit les interests pour seruir à cent de Dieu, il auoit passé plus auant, il aue protesté qu'il estoit mort à soy-mestr pour viure à Christ, ce qui pose en co en luy lamesme indifference, & le m ) jell 6.<sup>9</sup>

ine melpris pour scholes qui le régar? dent luy-mesme, & le mesme soin pour la gloire de son maistre. Enfin il auoit declaré qu'il ne cognoissoit plus personne selon la chair, c'est à dire, qu'il no consideroit plus ses prochains par les alliances du sang, ou par les amitiés qu'ils pourroient auoir contractées ensemble, qu'encore que les Iuiss fussent fes freres selon la chair, neantmoins il ne pouvoit par vne lasche complaisance approuuer qu'on messast les ceremonies de la Loy auec la doctrine de l'Euangile, & qu'on confondit les ombres de Moyse auec les lumieres du Seigneur Jesus. En tout ce discours il fait donc naniere de viure. Il sembloit à la ve-Ierusalem, & s'exercer là où dans la octrine des Pharisiens, ou dans son sestier de faire des Tentes, que c'est insi que les hommes ent accoustumé Cen vier, non pas aller de prouince en ouince, sans se proposer pour but l'a-sucement de ses assaires, ny l'establist henr, comme l'on parle de sa forruau contraire s'exposant à diuersperils, à des contradictions continuelles, & à de violences persecutions, ce qui sans doute paroist vne grande folies à en juger humainement. Ne vous estonnez pas, dit l'Apostre, de ma conduitte; des qu'on est à Christ, on nevir plus selon les maximes du monde, on change bien d'inclination & d'humeur, on me cherche plus que la gloire d'viss grand Maistre, & s'il faut pour le serus qu'on abandonne ses biens, ses parens, pere, mere; femme, enfans, amis en renonce à soutes ces choses auec ion Si quolqu' un oft en Christ il oft wounelle eniture. Le Choestien fait de nouvelles al liances, & de nouvelles amitiés; où a passant vous pouuez romarquer qui dans le Ciel nous n'aymerons rien qu'e nostre Dien, cos lions du sang & dela nature, ne hiblisteront plus, autrement la felicité d'vn pere seroit troublée s'il voyoit son enfant abysmé auec les demons, mais alors nous deteffetons tou ocux qui sesseront opposés à Dieu, 8 nous aymerons tous coux qui sçauro luy plaire, se seront là nos peres, n freros, & nos amis. Cette façon d'a mer commonee icy bas dans l'Egl cous les gens de bien y sont nos alliés, & tous les meschans nous y déplaisent, nous n'aymons plus selon a chair, mais Misclon Dieu, non pas seulement par les zengagemens de nostre naissance mais disprincipalement par les deuoirs de no-Of the nounelle creation. Ie pourrois bien vous direicy que par le terme de nouuelde creature, il entend vno creature excellente, ainsi vn Cantique nouueau est au stile de Dauid vn Cantique excellent. & le vin nouneau que lesus esperoit de boire au Royaume de son Pere, estoit y vn breuuage excellent, & la raison do cette façon de parler est prise, de ce que les choses du monde passent, se flaistrisfent, & s'vsent en vieillissant; Et celles qui sont encore nouuelles estant plus 🖟 durables sont de plus grand prix que , celles que leur vieillesse nous va faire perdre dans peu de temps. Ie pourrois encore vous dire, que nostre corruption est appellée le vieil homme, pour ce qu'elle est le fruit du premier Adam, & que la sainteté nous rend nounelles reatures, pour ce qu'elle est en nous l'image du second Adam, du nouvel homme, qui est Iesus-Christ nostre Seigneur. Mais à mon aduis l'Aposta voulu dire icy simplement, qu'il sat que celuy qui deuient Chrestien change de conduitte & de vie, qu'il soit tout autre qu'il n'estoit auparauant, que passant du l'aganisme ou du Iudaisme à la Religion de Christ, ou que se conuertifant de ses pechés par l'essicace du sain de Esprit, pour se consacrer au service de Dieu, il devoit estre vn autre homme, yn homme tout nouveau, si quelqu'un estre con Christ qu'il soit nouvelle creature.

Nous deuons paroistre en trois differents estats, en la nature, en la grace, & en la gloire; La nature nous fait naistre hommes, la grace nous fait deuenir sidelles, la gloire nous doit rendre bienheureux. La nature nous donne la lumiere de la raison, la grace sousmet & raison à la foy, & la gloire doit esclarer parsaitement nos esprits par la presence de la divinite, & par la vision de laface du Seigneur. La nature nous introduit dans le monde, la grace nous transporte dans l'Eglise, la gloire nous esseue au Ciel: quand de l'estat de l. grace nous passerons à celuy de la gloire, il y aura en nous vn changement bies

visible, & vn renouuellement bien merueilleux. Ce corps incorruptible reuefira l'incorruption, il est corps sensuel, il sera corps spirituel, il sera enuironné de lumiere, & pour tout dire en vn mot, il sera rendu conforme au corps glorieux de nostre Sauueur. Nostre ame sera esclairée de nouvelles cognoissances, enflammée de l'amour de Dieu, & remplie de satisfaction & de ioye. Nos. occupations seront bien differentes de celles qui nous attachent en cette vie. Nous ne penserons plus à nourrir nostre corps, à le vestir, à le guerir de ses maux, à conseruer sa vigueur, ou à la reparer quand il la perduë. Nostro vnique employ sera celuy de celebrer les louanges. du Dieu viuane, de receuoir les tesmoignages de son amour, & de luy donner ceux de nostre recognoissance. Et lors. que nous passons de la nature à la grace, il faut qu'il y ait & au dehors dans nostre conduitte, & sur tout au dedans en nos inclinations vn changement admirables. Il faut que nostre esprit change de desseins, & d'opinions, que nous ne fassions plus consister nostre bon heur, à nous vanger, à nous enrichir, à passer

vne vie voluptucuse, mais à estre bien auec Dieu, à edifier nos prochains, & à posseder la paix de nos consciences. Il faut que nostre volonté change d'habitudes, qu'elle haysse le peché qu'elle aymoit tant, & qu'elle ayme la pieté, pour qui elle auoit tant d'auersion, ou du moins tant d'indifference. Il faut que nos passions se moderent, & que tout l'estat de nostre ame soit renouvellé. Dans la nature l'homme est ignorant, chagrin, vicieux & miserable, il se trauaille pour des choses de neant, il tremble à la pensée de la mort, il est dans des inquietudes continuelles. Dans la grace, le fidelle a les yeux de son entendement illuminez en la cognoissance dessecrets du Ciel, il triomphe au milieu des miseres de la vie, & des horreurs de la mort, il se resiouyt en Dieu d'vne ioye inenarrable & glorieuse, & soustenu par l'asseurance de l'amour de Dieu, il insulte au monde, au diable, & à la mort, Qui me separera de la dilectien de Dieu scra ce oppression, angoisse, famine, nudité, peril, ou espée, ains en toutes ces choses nous sommics plus que vainqueurs, en celuy qui nous a aymez, ie suis asseuré que ny

mort, ny vie, ny Ange, ny Principauté, ny Puissance, ny choses presentes, ny choses à venir, ny hautesse, ny prosondeur, ny aucuna autre creature, rien ne me separera de la dileetion que Dieu ma portée en son Fils Iesus-Christ. Rom. 8.

Que la discipline de Iesus est belle: Et qu'vn Chrestien qui la suit est vn spectacle merueilleux sur la terre! Vn tel homme est donc persuadé qu'il a esté reconcilié auec Dieu par le Sang de Iesus-Christ, & que Dieu est maintenant son protecteur & son pere. Il est persuadé qu'il n'y à rien de beau, que l'innocence, & la charité, sa maxime est qu'il faut tousiours faire du bien à tous, il est bon pere à ses enfans, bon enfant à son pere, bon mary à sa femme, bon maistre à ses seruiteurs, bon seruiteur à ses maistres, bon Roy à ses sujets, bon sujet à son Roy, & bon citoyen à la republique. Il a vn secret admirable pour obliger ses ennemis à se repentir de l'auoir outragé, c'est qu'au lieu de se vanger il leur fait du bien, il gagne leur cœur, ouil les confond par les marques de sa bonté; il porte vne ame intrepide dans les perils, il n'a point de cruauté

į

dans les combats, il ne prend pas plaisir à repandre le sang; mais comme il tient l'espée de la main du Prince, il la met en viage par son ordre, & comme il ne craint pas la more, il se porte auec ge-nerosité par tout, où le seruice de son Roy& de sa patrie l'appelle. Escoutezle quand il parle, vous ne trouveres point ny de raillerie basse, ny de parole sale dans ses discours, son entretien est vtille & vous ne le quitterez iamais sans y auoir profité. Voyez-le agir, vous ne luy verrez iamais tromper personne, vous trouuerez qu'il a acquis bien legitimement ce qu'il possede, & vous ad-uouerez mesme, qu'il seroit dommage que ces biens ne fussent pas entre ses mains, puis qu'il les fait seruir au soulagement des miserables. Sa conversa-tion n'est point chagrine, il y a quelque air de paix, de douceur & de ioye melme, qui se faitsentirà ceux qui l'approchent; Et si on pouvoit penetrer dans fon ame, on y verroit regner vne gran-de tranquillité, vne serenité & vn calme que les afflictions mesme n'interrompent pas. On y verroit des sentimens genereux, des pensées charitables, des

esperances releuées, & sur tout cette paix de Dieu, qui surmonte tout entendement. Vne creature animée de la sorte, reuestude de ces ornemens, n'est-elle pas bien differente de cét homme que la naturo auoit fait & meschant, & si miserable? N'a-il pas receu vn nouuel estre, & son estat à le considerer de la sorte, n'a-il pas plus de conformité auec celuy de la gloire qu'auec celuy de la nature? il a desia vn principe d'immortalité qui est le S. Esprit, il s'est desia separé du monde par ses desirs, & vous diriez que c'est vne estoille detachée du firmament, qui fait ses efforts pour s'y enuoler, afin d'y briller d'vn nouuel esclat, d'vn esclat eternel, s'estant deueloppée des tenebres de la terre. O mes freres, mes treschers freres, relles doiuent estre ces nouvelles creatures, tels doiuét estre les veritables Chrestiens, c'est là ce à quoy ils sont appellez, à sçauoir en delaissant les choses qui sont en arriere à s'auancer vers celles qui sont en anant au prix de nostre supernelle vocation: A reluire icy-bas comme des flambeaux au monde, au milieu de la generation tortuë, & peruerse. A faire paroi-Arc la lumiere de leurs bonnes œuures aux

jeux des hommes afin que leur pere qui est aux Cieux en soit glorisié. A chercher ensur les choses qui sont d'enhaut, là où Iesus-Christ est à la dextre de Dieu: car ils sont morts & leur vie est vachée auec Christ en Dieu. Si donc quelqu'vn est en Christ qu'il soit nouvelle creature.

Vous voyez bien maintenant la force du raisonnement de l'Apostre, il veut que si vn homme donne son cœur à lefus-Christ, il viue apres cela tout autrement que les mondains, qu'il paroisse vn changement considerable en sa conduitte, & que ses actions, & ses paroles soient aussi bonnes & aussi edifianres, qu'elles ont auparauant esté mauvaises & scandaleuses. Vous n'auez sans doute point de peine à comprendre l'euidence & la necessité de cette raison qu'il employe: Car comme les mœurs, & les coustumes des peuples sont differentes, comme les langues, les habits, la façon de viure les diffinguent les vns des autres, comme vn François serendroit ridicule, s'il vouloitviure parler, & agir comme vn Estranger, il faut que le Chrestien se distingue de mesme d'auec le reste des hommes, puis que le Royaume

į

T)

ijŖ,

1

1

Ì

ı

Ì

Royaume de Christ, & celuy du peché & du monde ont de differentes loix, & de differentes coustumes. Les Grees furent irritez de voir prendre à Alexandre la robbe des Persans qu'il auoit vaincus, auec leurs habits ils craignirent qu'il ne reuestit leur molhesse, & si le coent du Chrestien est comme celuy de l'infidelle, il a defpouillé la foy, & a par ses mœurs corrompues deshonore la profession qu'il Fait d'estre au Seigneur Iesus, 2. Cesesoit eneors vne chose bien estrange que les os d'vn Prophete mort, eussent par leur attouchement redonné la vic à vn homme, Dieu produisant ce grand miracle pour iustistifier le mi. nistre de son seruiteur, ce seroit vne those bien estrange qu'vne semme malade depuis plusieurs années, eust en vn moment recouuert la santé en rouchant le bord du vestement de no-Are Sauueur, & que des ames vnies à Christ, & en qui Christ habite luymesme, demeurassent encore dans la mort: Ce ne sont pas icy ses os, co n'est pas icy le bord de sa robbe, c'est

vous disa, que cela ne s'accorde pas auec sa valeur, qu'il seroit un lasche s'il souffroit ces choses, & que le monde se mocqueroit de luy, si on le voyoit viure de la sorte. Demandez au Luxurieux, s'il ne veut pas consacrer son corps au Seigneur Iesus, & ne l'abandonner plus aux souilleures de l'impudicité, s'il ne veut pas renoncer à ses folies passions, rompreson commerce infame, & destourner mesme ses regards de dessus les objets, qui pourroient r'allumer ces seux qu'il doit & soigneusement esteindre, se souuenant de la leçon du Seigneur, qui nous dit que celuy qui a regardé une femme pour la convoiter, il a desia en son cœur commis adultere auec elle, Math 5. 28. il aura bien l'impudence de vous respondre qu'vne chasteté si exacte n'est pas bien-seante à vn homme, & qu'il ne faut pas dessendre si souerement les plaisirs de la jeunesse; Demandez à l'auare, si dans la necessité de son prochain il est resolu de luy prester sans esperance d'en rien receuoir, s'il est prest à abandonner ses biens pour

suiure le Seigneur Icsus, s'il veut restituer tour te qu'il n'a pas assez legitimement acquis, il vous dira que les biens coustent trop à acquerir pour les hazarder de la sorte, & il se flatte qu'il a assez legitimementacquis, ce qu'il a acquis auec assez de seureté du costó de la justice des hommes. Enfin épluchez curieusement ces cœurs remplis de vanité, ces ames enflées d'orgueil, qui n'ayment qu'elles mesmes, & qui mesprisent tout le monde, vous n'y trouuerez pas graué vn article de la Loy de Christ, & vous n'y verrez pas luire vne esteincelle du feu sacré de son Esprit. Et neantmoins auec tout cela, comme si c'estoit vn tiltre sans effect, ces gens là s'appellent Chrestiens. Quittez, mal heureux, quitez vn si beau nom, où vous rendez dignes de le porter, en y conformant vostre vie; si quelqu'on n'ayme pas le Seigneur Iestu Christ, qu'il soit anatheme Maranatha, 1. Cor. 16.22. Et que pensez vous que c'est, aymer le Scigneur Iesus, non pas aymer son visage, puis que nous ne le cognoissons È ij

pas selon la chair: mais aymer la debonnaireté, la charité, la pieté, la patience, le zele, qui sont les traits de la peinture sous laquelle l'Euangile nous la voulu representer. Iusques à quand donc demeurerez vous, s mauuais Chrestiens, endormis dans cette securité charnelle, & dans ce sommeil de mort? Apprenez que les Disciples de Christ ne viuent pas de la sorte, & si vous recognoissez ce grand Maistre il est temps de changer à bon escient d'inclination & de mœurs.

O que ce seroit vne belle chose in nous estions tous gens de bien, pieux zelez, charitables, & pour tout dire en vn mot, Chrestiens & nouvelles creatures! Auec quelle amitié, auec quelle sainte vnjon viurions nous les vns auecque les autres! quelle douceur de conversation! quel plaisir de la vie! quelles consolations de l'ame! quel Paradis, & quelle se licité trouverions nous sur la terre. A quoy tient il que nous ne viuion de la sorte? le Seigneur Iesus ne nous de la sorte? le Seigneur Iesus ne nous

eR-il pas annoncé? la grace ne nous est-elle pas offerte? ses loix ne nous sonr-elles pas cognenes è ses Sacremens, qui nous apprennent & son amour, & nostre debuoir, ne nous font-ils pas administrez ? Maudita obstination, que tant d'efforts na peuvent vaincre! Gaignons tous les jours, & à tous momens, quelque chose sur elle, & faisons quelque progrez dans la pieté. Vous, Fidelles, qui ostes veritablement Chrostiens, mais Chrestiens encores infirmes, qui n'auez pas toutes les perfections de ceute nounelle creature vous de qui la foy & la pieré est encore comme dans le berceau, estudiez vous à fortifiet le nouvel homme: soyez convoiteux de dons spiriruels; rendez de tout voltre pounoir à la perfection, & puis que desia le Saint Efprit s'oft infinde dans vos ames, escoutez ses inspirations, suiuez ses mouuemens, de ne contribez iamais cét hoste Divin; qu'il regne dans vos cœurs, & que tontes les fortes resses du peché y estant destructes, il ames

ne vos pensees captines à la Croix de Christ.

Sur tout, mes Freres, ces grandes folemnitez sont comme des journées choisies pour combattre plus genereusement contre le peché, & contre le ; monde, pour nous engager au feruico de Christ, & pour guerir de nos foibles fes. Icy nous nous donnons à Christ, en luy renouvellant les vœux de nostre fidelle obeyssance, Icy le Seigneur Iesus se donne à nous pour nous viuisier, & pour nous ayder à vaincre, en nous metrant en main les Symboles sacre de la Chair, & de lon Sang. Mais que nul necençoine icyrien de groffiern de charnel, nous vous auons monstre que noiss sommes en Christ d'vne maniere spiritualle, c'est son Esprit & non passon Corps qui vient habiter en nosames, c'eltsa Gracese non pas son Sang, qui desaltere effectivement no cœurs, mais c'est son Corps rompu,& son Sang épandu qui nous ont merice cet esprit, & cette grace, c'est de la mort de losses. Christ que découle en nous cette vie, c'est par ses sous france frances qu'il nous a obtenu ces ine-

Mes freres bien-aymés, s'il nous estoit permis en ce iour de vous parler d'autre chose que de cette mort, & de ces souffrances de Christ, sice n'en stoit pas cette scule mort que nous sommes obligez de vous annoncer toutes les fois que nous mangeons de ce pain, & que nous beuuons de cette coupe; le n'aurois garde de manquer à vous entretenir de la mort de ce sainet seruiteur du Seigneur Ie- Monsseur sus qui vient d'estre arraché d'entre le Faucheur mort le 7. vos bras, & qui vient d'apporter vn Avril 1657. dueil public à cette Eglise. Dieu nous commande de conserver la memoire de nos conducteurs qui nous ont porté la parole de vie, il veut que nous imitions leur foy, & que nous considerions quelle a esté l'issue de leur conversation. Mais à qui plus iustement pourroit on rendre ca deuoir, qu'à ce fidelle Pasteur, qu'à ce vicillard venerable, dont l'amo estoit sans fiel, dont la reputation a esté sans tasche, dont la vie a esté si belle, si sainte, & si glorieuse iusques

F

à son dernier moment. Certes il amit joint heureusement ensemble vne grande erudition à vne extraordinaire Eloquence, mais à vne Eloquence veritablement Chrestienne qui auoit tout l'art de celle des plus grands Orateurs du siecle, mais qui estoir pure, sage, celeste. Il auoit commencé de bonne heure à estaller ses dons incomparables sur la chaire, il auoit esté maistre en vn aage, ou les auttes commencent à peine à estre disciples, il auoit consacré sa jeunesse à Dieu,& il a annoncé ses louanges iusques à si vieillesse toute blanche. Son zele dam cét aage auancé suppleoit bien le fei de sa premiere ieunesse, cet astre a ierté vn grand esclat mesme dans son ocvident, & vous estes tesmoins que le derniers Sermons de ce grand hom-me ne tesmoignoient pas la pesanteur de ses annees: Quelque longue qu'a esté sa vie, quelques infirmitez qui experimentalt, depuis quelque tempil nous estoit tousiours à vne singulie re consolation: C'estoit tousiours v des Chariots d'Ifrael, comme Elize

donnoit ce tiltre à son maistre, parce que les Saints Hommes sont nostre force, & qu'au iour du courroux de Dieu, ils se mettent à la breche & le destournent par leurs souspirs. Vous n'auez plus ce grand home, M.F. Dieu l'a recueilly dans le Ciel, où il courone sa sidelité, il se repose apres ses longs trauaux, & participe à la joye de son Seigneur. O si au moins Dieu a pitié de ce troupeau, & luy suscite quelque digne ouurier qui puisse essure les larmes, reparer sa perte, contribuer à son edification, & remplir vne place qu'vn si saint homme vient de laisser vuide!

Ç,

Mais ie n'oublie pas que c'est à la Mort de Iesus Christ que nous deuo ns toutes nos pensees, c'est luy que ce pain rompu, & que cette coupe nous representent, c'est luy qui est crucissé deuant nos yeux en ce mystere; c'est luy qui veut estre en nous, qui veut que nous soyons en luy. Que Iesus donc entre en nos cœurs, & que nos cœurs soient desormais les Temples où il habite: Qu'il entre dans nos intelligences, pour leur persuader viucment ses

veritez, qu'il entre dans nos volontez pour v grauer ses loix, & pour y escrire ses Ordonnances; qu'il entre dans nos memoires, pour y imprimer le souuenir de ses graces; qu'il soit le maistre absoiu de nos passions, de nos desirs, de nos inclinations, que nostre viene respire que Christ, que la debonnaireté de Christ, que la charité de Christ, quo le zele de Christ, que la patience de Christ, que nous ayons tousiours la modestie du Seigneur Iesus dans les yeux, sa parole en nos bouches, sa liberalité en nos mains, & sagrace espanduë sur nos levres Seigneur Icsus, nous sommes Chrestiens, pardonnenous si iusques icy nous n'auons pas bien soultenu la gloire d'vn si beau Nom, & si nous n'auons pas eu le respect que nous deuions auoir pour vne Religion aussi sainte, que celle que tu nous a enseignee: Nous auons dessein de mieux viure, nous voulons estre à toy, ton Esprit dit à nos cœurs de ta part, cherche mon visage: & nous cherchons ton visage, ô Seigneur. Nous voicy tes seruiteurs, qu'il soit

fait en nous selon ta parolé; qu'estans vnis à toy, nous soyons veritablement rendus nouvelles crertures; que Satan, que le monde, que le vice n'ait plus de pouvoir sur nous. Sauvenous, ô Seigneur Iesus, renouvellenous, sanctifie-nous, aduouë-nous pour tes Disciples, & nous t'adorerons eternellement, comme nostre Maistre, & comme nostre Dieu. Ainsi soit il.

Età ce grand Sauueur fils eternel de Dieu, comme au Pere, & au S. Esprit soit honneur, empire, & magnificence aux siecles des siecles. Amen.